

## YOANE ME NIINÄCE LETA

### *Ireclota Mene poto cidi me*

<sup>1</sup> Lui tage agedna cabu ca, cine lui ne titecijane-nanumesi, lui ne tepänenanumesi irecu ca, lui cabu me ire nicijenanimi, cuta lui ne toomlananumesi ime ca, cine teeme poto cidi me yoogärenisi. Tabe lui Ireclota Mene gyene. <sup>2</sup> Ai ireclota te liba taboclomtuji, cine tepäne-nanumesi, cine siige page jewabudnitenisi, egä tabe laasi nyene. Lui te iyeteta gyene, lui te Babe cama ge, siige cime bau me taboclomtuji, cine teeme poto cidi me weebibine jijananenininago. <sup>3</sup> Cine ngena ituge päpäna, ngena poto cidi me cine ituge ätecija, cine peei poto cidi me jijananenininago weebibine naace täapume egä weene piba cine cama yepä me äbitame epu pana cine lipu yepä gemi Babe piyepu teeme Bägrä Yeesu Keriso cama. <sup>4</sup> Cine ai ne naace täapume yoogärenisi egä mime gege te baborage äbitame.

### *Acejiyame Lui Apaclyera Gyene*

<sup>5</sup> Cine lui mene ituge ätecija Acejiyame me Bägrä bau ca, cine lui mene cuta weebibine jijananenininago, pui mene apu gyene egä Acejiyame lui apaclyera gyene, teeme cabu nuuja krokeciye lica gyene. <sup>6</sup> Peei name pi mine liba jiicusi, egä mine Acejiyame cama yepä gemi, yepä mine krokeciye cabu waatninago, mine peei lui walya waatrominago, conocäco mule bine lica jaawenimusi. <sup>7</sup> Yepä mine liba apaclyera cabu

ninajininuge Acejiyame liiyepu, mine piba yepä ngene atwana cama ninajininuge, siige teeme Bägrä Yeesu Keriso me uudi te jugi cäco me niwenininuge iyeta niiya mule cabu ca. <sup>8</sup> Mine liba jiiçusi egä mine conocäco biname gemi, mine mimämu langletnäjinago, siige mime cabu nuuja toraca mene lica gyene. <sup>9</sup> Yepä mine liba mime niya mule bine jaawabudnemusi, Acejiyame toraca piiyepu conocäco gyene, siige mime niiya mule lica yaawadimuge, jugi cäco me niwenininuge iyeta conocono mule cabu ca. <sup>10</sup> Mine liba jiiçusi, egä mine conocono mule lica ituge wawenetnäja, mine siige Acejiyame ne walya me jaawenusi, teeme mene mime cabu lica gyene.

## 2

### *Keriso Lui Mime Ätityera Biname Gyene*

<sup>1</sup> Cäme binamewale, weene ätrunga cabu ca lui cäme bägrä gemi, cane ai ne yoogärinine weeme bau me naace täapume egä weene niiya mule lica wawenecame. Yepä laati te liba niiya mule bine jaawenimuge, mime pisi nyene conocäco biname Yeesu Keriso, lui te Babe me opo gaabe je niwärimtinuge. <sup>2</sup> Tabe peese nyene biname lui te mime niiya mule daremu ne egluji. Yoo, tabe mime taatu niiya mule daremu ne lica egluji, iyeta biname bime. <sup>3</sup> Mine liba Acejiyame me mene yäacwetnusi, mine siige umle gemi apu egä mine umle gemi tabe. <sup>4</sup> Laati te liba jiiçuge, egä tabe umle gyene Acejiyame, yepä teeme mene lica yäacwetnuge, tabe walya biname gyene, teeme cabu lica gyene toraca mene. <sup>5</sup> Yepä laati te liba

Acejiyame me mene jäätecijuge, tabe toracarage singi birige teeme täápume. Peei cabu ca mine umle gemi, egä mine Acejiyame cabu ninajininuge. <sup>6</sup> Laati te liba jiicuge, egä tabe Acejiyame cabu yaanajuge, tabe miiji epu lenaja Yeesu Keriso liiyepu.

*Kirece Mene Ätecija täápume*

<sup>7</sup> Cäme miijirage binamewale, cane lui mene yoogärinine weeme bau me, kirece mene lica gyene, pätä pui sasa mene gyene, weene lui ituge ätecijana, weene liba weeme ätrunga ne yaacitepeye Yeesu Keriso cabu me. Ai lui pui sasa mene gyene, weene lui niinäce itu itecijipi. <sup>8</sup> Yepä nuuja pototo ta kirece mene gyene, cane lui yoogärenine, siige Keriso cabu ca cuta piyepu weeme cabu ca ituge päpäna, egä ai lui toraca mene gyene, inge krokeciye te äyebtingtenige weeme cabu ca, toraca apaclyera te tuungepmalenige. <sup>9</sup> Laati te liba jiicuge, egä tabe apaclyera cabu enajenige, yepä tabe nuuja ätrunga biname ne jäämugetnuge, tabe camu krokeciye cabu yaanajuge. <sup>10</sup> Yepä laati te liba nuuja ätrunga biname täápume singi läbitanuge, tabe apaclyera cabu yaanajuge, siige teeme cabu nuuja mule lica gyene, lui te nuuja biname bine jaawenimuge conocono mule wawenecame. <sup>11</sup> Yepä laati te nuuja ätrunga biname ne jäämugetnuge, tabe krokeciye cabu yaanajuge piyepu waatnuge. Tabe umle lica gyene liiyeme läduge, inge krokeciye te teeme irecu yaacwabuge.

<sup>12</sup> Cäme binamewale, ätrunga cabu lui kirece gemi, cane yoogärenine weeme bau me, inge

naace popi weeme niiya mule äcisäjeji gemi Keriso me ngii name pi. <sup>13</sup> Cane yoogärenine weeme bau me lui niinäce gaabe biname gemi ätrunga cabu, inge naace popi weene umle gemi Keriso, lui te agedna cabu ca gyene. Piiyepu lamlecu ätrunga biname, cane weeme bau me yoogärenine, inge naace popi weene iyeta niiyaniya mule bime yageyame ne ituge apremela. <sup>14</sup> Cäme biname-wale, ätrunga cabu lui kirece gemi, cane ai lui bii byoogärine weeme bau me, inge naace popi weene umle gemi Babe. Cuta niinäce gaabe biname gemi lui ätrunga cabu, cane ai lui bii byoogärine, inge naace popi weene umle gemi Keriso, lui te agedna cabu ca gyene. Cuta lamlecu ätrunga biname, cane ai lui bii byoogärine weeme bau me, inge naace popi weene kokre gemi piiyepu Acejiyame me mene te weeme cabu yaanajuge piiyepu weene ituge apremela iyeta niiyaniya mule bime yageyame ne.

<sup>15</sup> Gone singi äbita ai gawecewe mule poto cidi me piiyepu ai gawecewe gwidape täápume. Weene liba gawecewe mule täápume singi inajininuge, weene piba äblicäco Babe täápume singi lenaja, <sup>16</sup> inge naace popi ai gawecewe me mule lui Acejiyame bau ca lica gemi. Niiya singisingi lui cina biname bine yaawadäjemusi, piiyepu biname cina ngena jääpänanemusi siige singisingi läbitininusi, cuta piiyepu iyeta ai gawecewe muleyame biname cina lui täápume mage gege, ai mule lui Acejiyame bau ca lica gemi, yepä teepi ai gawecewe cabu ca gemi. <sup>17</sup> Gawecewe piiyepu teeme iyeta gwidape, biname cina lui täápume mage singi yaacrajuge, teepi apirininisi, yepä laati

te Acejiyame me singi ne jaawenuge, tabe ngälu cäco yaanajuge.

*Keriso me Äciseräjayame*

<sup>18</sup> Cäme binamewale, ätrunga cabu ca lui cäme bägrä gemi, ngälugaabe mameta gyene. Weebibine ituge jaji, egä Keriso me Äciseräjayame te cirege otni, siige page bucurage piti nemi, peei name pi mine umle gemi, egä ngälugaabe mameta gyene.

<sup>19</sup> Teepi puu mime sobe cabu ca itu läsipesi, yepä teepi mine cama yepä lica gemi. Teepi liga mine cama yepä cirege, teepi mine cama cire yaacrajeji. Yepä teepi lipu ituge äyebengäja mime cabu ca, peei te niwabininige, egä teepi mine cama yepä lica gemi.

<sup>20</sup> Yepä Keriso te weebibine Aceji Seemo ca ituge äciseja, siige weene iyeta umle gemi, ngena gyene toraca mene. <sup>21</sup> Cane naace name pi lica yoogärenine weeme bau me, egä weene umle cäco gemi toraca mene. Pätä cane naace name pi yoogärenine, egä weene umle gemi toraca mene, piiyepu weene umle gemi, egä toraca mene cabu ca äblicäco nuuja walya te otni.

<sup>22</sup> Siige laasi nyene walya biname? Tabe peese nyene, lui te jiicuge, egä Yeesu lica gyene Keriso. Tabe Yeesu me Äciseräjayame gyene, siige jäägyuge Babe Bägrä wäsi bine. <sup>23</sup> Laati te liba jäägyuge Bägrä ne, tabe Babe ne cuta jäägyuge; laati te liba yaacatuge Bägrä ne, teeme cuta Babe pisi nyene. <sup>24</sup> PEEI name pi weene lui mene itecijanipi, weene liba ätrunga biname me läbitipeye, kokre joomlep-eye. Pui mene te liba weeme cabu yaanajuge, siige weene piba yepä gemi Babe Bägrä cama.

25 Piiyepu Yeesu Keriso lui gwidape ceerame itu nijinuji, iyeteta ireclota gyene.

26 Cane weeme bau me ai mene yoogärenine eei biname bime poto cidi me, lui cina weebibine angletnejame äbitininisi. 27 Yepä weene pepu lica gemi, Keriso te Aceji Seemo ca weebibine ituge äciseja, siige tabe weeme cabu yaanajuge, peei name pi weene singi lica gemi nuuja te weebibine abiberäjame, ingle tabe te ibiberäjininuge iyeta gwidape poto cidi me. Piiyepu tabe ngena ibiberäjininuge, toraca gyene, walya lica, peei name pi teeme abiberäja ne icwetnepeye, piiyepu Yeesu Keriso cama yepä inajipi.

28 Yoo cäme binamewale, weene ätrunga cabu ca lui cäme bägrä gemi, gone Yeesu Keriso ne yaabmaluye! Piba tabe liba cire taboclomtepi, mine wälu lica cirege äbita teeme täapume, piiyepu teeme acnenuta bimu liba cirege, mine piba nuuja singi lica ajiri name pi ämletnerame teeme bau ca. 29 Weene umle gemi, egä Keriso lui conocäco biname gyene. Piba weene cuta miiji umle, egä iyeta lui cina conocäco mule bine jaawenimusi, teepi lui Acejiyame me bägräwale gemi.

### 3

#### *Acejiyame me Bägräwale*

1 Weene jepäneye, Aceji Babe te lipu babo singi ituge mime täapume! Teeme singi epu baborage gyene egä mibibine niyinininusi Acejiyame me bägrä ca, siige mine peei gemi. Gawecewe muleyame biname cina umle lica gemi mine, ingle teepi umle lica gemi Acejiyame. 2 Cäme

miijirage binamewale, page mine Acejiyame me bägrä gemi, cuta camu gyene cängena pajecu me äbita, egä mine lipu äbitame. Yepä mine umle gemi, egä Keriso te liba cire taboclomtepi, mine teeme pana cire läbitipago, ingle mine teebine cire jääpänepesi epurage tabe liiyepu. <sup>3</sup> Siige laati te apu ngene atwana singi yaacituge Yeesu cabu me, tabe teeme ngenecu jugi cäco me jaawenuge, Yeesu me ngenecu lipu jugi cäco gyene.

<sup>4</sup> Laati te liba niiya mule jaawenuge, tabe Acejiyame me cotre ne jaatropangtuge, ingle niiya mule lui cotre ibi mule lica gyene. <sup>5</sup> Weene umle gemi, egä Yeesu täduji niiya mule bine äyebengäjame, cuta weene umle gemi, egä teeme cabu nuuja niiya lica gyene. <sup>6</sup> Peei name pi laati te liba Keriso cabu yaanajuge, tabe niiya mule bine lica jaawenimuge. Yepä laati te niiya mule bine jaawenimuge, tabe lica ituge teebine päpäna cuta umle lica ituge tabe.

<sup>7</sup> Cäme binamewale, ätrunga cabu ca lui cäme bägrä gemi, weene gone nuuja ne ire taatu jaacituye weebibine angletnejame. Laati te liba conocäco mule bine jaawenimuge, tabe lui conocäco biname gyene Yeesu Keriso liiyepu. <sup>8</sup> Yepä lui biname te niiya mule bine jaawenanemuge, teeme ingle Satani bau ca gyene, ingle Satani lui niiya mule wawenecayame gyene agedna cabu ca. Acejiyame me Bägrä te naace täapume täduji Satani me kaakesea ne aglime.

<sup>9</sup> Laasi nyene Acejiyame me bägrä, tabe niiya mule bine lica jaawenanemuge, ingle Acejiyame me ireclota pisi nyene teeme cabu. Tabe äblicäco niiya mule wawenena, ingle Acejiyame teeme

Babe gyene. <sup>10</sup> Mine eei cabu ca umle läbitininago, egä Acejiyame me bägrä lui gemi, Satani me bägrä lui gemi, ingle laati te liba conocäco mule bine lica jaawenanemuge piyepu ätrunga biname bime täöpume singi lica yaanajuge, tabe lui Acejiyame me bägrä lica gyene.

*Weene Mijji Weemämu Singi Äbitanipeye*

<sup>11</sup> Weene lui mene itecijanipi, weene liba läbitipeye ätrunga biname me, age sena pui mene: mine mijji mimämu singi lenaja. <sup>12</sup> Mine gone Adamu me bägrä Kaino pana äbita, Satani te lui ne ecanuji, siige tabe teeme igane ne egluji. Tabe eei name pi igane ne egluji, ingle tabe conocono mule jaawenemuge, igane te conocäco mule jaawenemuge.

<sup>13</sup> Cäme ätrunga binamewale, weene cälu te gone jitinuge, liba gawecewe muleyame biname cina jimugitninusi weebibine. <sup>14</sup> Ingle naace popi mine singi gemi ätrunga biname bime täöpume, peei name pi mine umle gemi, egä mine budre gaabe ne itu yaabmalepesi, ireclota gaabe ne itu yaacatepesi. Laati te liba singi lica ätrunga biname bime täöpume, tabe budre gaabe cabu camu yaanajuge. <sup>15</sup> Laati te liba jäämugetnuge nuuja ätrunga biname ne, tabe teeme budre me wawena biname gyene. Piyepu weene umle gemi, egä lui te nuuja biname ne budre me jaawenuge, teeme cabu iyeteta ireclota lica gyene. <sup>16</sup> Yeesu lipu teeme ireclota ne iyemaluji budre täöpume cimiji pi, mine peei cabu ca umle, egä toraca singi lipu gyene. Mine mijji cuta teeme pana mime ireclota äyemela poto ätrunga biname bime täöpume. <sup>17</sup> Liba



ätrunga biname yepä me iyeta gwidape piti nemi, siige tabe jääpänuge, teeme ceege me gwidape lica gyene, yepä tabe lica yääcäruge, tabe piba äblicäco iicana, egä Acejiyame me singi pisi nyene teeme cabu. <sup>18</sup> Cäme binamewale, ätrunga cabu lui cäme bägrä gemi, mine gone mime singi bine aboclomta biname bime bau me mene taatu ca, yepä mine miiji teebibine owecu waweneca.

### *Acejiyame me Bägrä Wälu Lica Gemi*

<sup>19</sup> Liba mime singi te lawabudnituge potu ätrunga biname bine ätityera ca, mine piba umle gemi egä mine toraca mule cabu ninajinuge, siige mine wälu lica cirege äbita Acejiyame me opo gaabe je. <sup>20</sup> Mine liba ngene ca laglinago, egä mime niya mule piti nemi, mine umle gemi egä Acejiyame baborage gyene mime ngene ca agli cabu ca, tabe umle iyeta gwidape. <sup>21</sup> Cäme miijirage binamewale, mine liba lica ngene ca laglinago, egä mime niya mule piti nemi, piba mine wälu lica gemi Acejiyame me opo gaabe je aclajutame. <sup>22</sup> Piiyepu mine teebine liba ngena täapume yäätinärusi, mine jääpänsi, inge mine teeme mene jäätrungusi piiyepu jaawenusi, teebine lui te ngenecu miiji me jaawenuge.

<sup>23</sup> Age sena Acejiyame mibibine lui täapume nijananinuge: mine miiji ätrunga acita teeme Bägrä Yeesu Keriso cabu me piiyepu mine miiji mimemime singi lenaja, Yeesu lipu mibibine ituge jaji. <sup>24</sup> Laati te liba Acejiyame me mene jäätrunguge piiyepu yääcwetnuge, tabe Acejiyame cabu pisi nyene, Acejiyame cuta teeme cabu pisi

nyene. Mine eei cabu ca umle gemi, egä Acejiyame mine cama pisi nyene, ingle tabe lui Aceji Seemo ne ituge acita mime cabu lenajame.

## 4

### *Toraca piiyepu Walya Seemo*

<sup>1</sup> Cäme miijirage binamewale, weene gone jäätrungimuye iyeta eei bine, lui cina jiiicusi, egä Aceji Seemo pisi nyene teeme cabu. Yepä weene teebibine epicetnäremepeye umle äbitame, egä lui seemo te enajenige teeme cabu, nää Acejiyame bau ca gyene coo lica. Weene apu wawenname, ingle bucurage biname cina itu yaatengläjepesi, lui cina jiiicusi, egä teepi Acejiyame me tagepogogo mene jiiicemusi, yepä teepi walya gemi. <sup>2</sup> Weene ai cabu ca opo yaawatnuye Acejiyame me Seemo ne, egä laati te liba jiiicuge, egä Yeesu Keriso lui biname me äbituji, pui biname cabu lui Seemo tabe Acejiyame bau ca gyene. <sup>3</sup> Yepä laati te pepu lica jiiicuge Yeesu poto cidi me, teeme cabu lui seemo te enajenige, tabe Acejiyame bau ca lica gyene, yepä tabe Keriso me Äciseräjayame me seemo gyene. Weene ituge ätecija, egä pui seemo te cirege otni, siige tabe page pisi nyene ai gawecewe cabu.

<sup>4</sup> Yepä cäme miijirage binamewale, ätrunga cabu ca lui cäme bägrä gemi, weene Acejiyame memi, siige weene ituge apremela lui cina jiiicusi, egä teepi Acejiyame me tagepogogo mene jiiicemusi, yepä teepi walya gemi. Weene teebibine naace name pi ituge apremela, ingle weeme cabu lui

Seemo tabe mage kokreyame gyene, yepä ai gawecewe mule cabu lenajayame biname bime cabu lui seemo, teeme toraca kokre lica gyene. <sup>5</sup> Teepi ai gawecewe memi, peei name pi teepi ngena jicemimusi, ai gawecewe cabu ca gemi, siige gawecewe muleyame biname cina jäätecijemusi. <sup>6</sup> Yepä mine Acejiyame memi. Laasi nyene umle Acejiyame, tabe mime mene yäätecijuge. Yepä laati te liba Acejiyame me biname lica gyene, tabe mime mene lica yäätecijuge. Peei cabu ca mine umle läbitininago, egä laasi nyene toraca Seemo cama, laasi nyene walya seemo cama.

*Acejiyame Lui Ingle Gyene Toraca Singi täápume*

<sup>7</sup> Cäme miijirage binamewale, mine miiji mimämu singi lenaja, ingle Acejiyame lui ingle gyene singi täápume. Laati te biname bime täápume singi yaanajuge, tabe lui Acejiyame me bägrä gyene piyepu tabe umle gyene Acejiyame. <sup>8</sup> Laati te liba singi lica gyene biname bime täápume, tabe Acejiyame umle cäco, ingle Acejiyame lui ingle gyene singi täápume. <sup>9</sup> Acejiyame te teeme singi ne seboclomtuji mime täápume, tabe lipu teeme japurage Bägrä ne tityepuji ai gawecewe cabu me naace täápume mine ireclota ne teeme cabu ca päpäname. <sup>10</sup> Singi lui epu lica gyene, egä mine te Acejiyame täápume singi ituge, yepä tabe te niinäce singi itu niglinuji mibibine, siige teeme Bägrä ne tityepuji mime niya mule daremu täápume. <sup>11</sup> Cäme miijirage binamewale, Acejiyame te liba pepu babo singi ituge mime täápume, mine cuta miiji mimemime singi lenaja. <sup>12</sup> Nuuja biname te lica ituge

Acejiyame ne pöpäna, yepä mine liba mimämu singi ninajininuge, tabe pisi nyene mine cama, siige teeme singi te babo läbituge mime cabu.

<sup>13</sup> Mine naace name pi umle läbitininago, egä tabe pisi nyene mime cabu mine teeme cabu, ingle tabe teeme Seemo itu nicäripi mibibine. <sup>14</sup> Babe te tityepuji teeme Bägrä ne ai gawecewe cabu me biname bine niiya cabu ca kälyä wawename. Mine ituge ai mule ne pöpäna siige poto biname bine jejananemenisi ai poto cidi me. <sup>15</sup> Piiyepu cuta laati te liba jaaitnuge, egä Yeesu lui Acejiyame me Bägrä gyene, Acejiyame pisi nyene teeme cabu piiyepu tabe lui Acejiyame cabu pisi nyene. <sup>16</sup> Mine umle gemi Acejiyame lipu singi gyene mime täöpume, piiyepu mine ituge ätrunga acita teeme peei singi cabu me.

Acejiyame lui ingle gyene singi täöpume. Lui te singi yaanajuge Acejiyame piiyepu ätrunga biname bime täöpume, tabe Acejiyame cabu pisi nyene piiyepu Acejiyame teeme cabu pisi nyene. <sup>17</sup> Singi te naace täöpume miiji babo äbitame mime cabu, egä mine piba wälu lica cirege äbita atrana bimu cabu, ingle mime ireclota ai gawecewe cabu epu pana Keriso me liiyepu. <sup>18</sup> Singi luma, wälu lica birige puma, ingle babo singi te wälu ne yääyecräjuge. Siige lui biname cabu singi te cäro camuge babo äbita, tabe wälu birige, ingle niiya mule daremu awagrija luma, wälu cuta puma.

<sup>19</sup> Mime singi pisi nyene Acejiyame täöpume piiyepu ätrunga biname bime täöpume, ingle Acejiyame te niinäce singi ituge äbita mime täöpume. <sup>20</sup> Laati te liba jüucuge, egä tabe singi

Acejiyame täápume, yepä nuuja ätrunga biname ne jäämugetnuge, tabe walya biname birige. Laati te liba singi lica nuuja ätrunga biname täápume, tabe lui ne jääpänuge, tabe äblicâco cuta Acejiyame täápume singi, tabe lui ne lica ituge päpäna. <sup>21</sup> Pui name pi Keriso te mibibine ituge jaji egä, laati te Acejiyame täápume singi birige, tabe cuta miiji ätrunga biname bime täápume singi.

## 5

### *Ätrunga te Gawecewe Mule bine Yäätucäremuge*

<sup>1</sup> Laati te liba jäätrunguge, egä Yeesu lui Keriso sine, tabe Acejiyame me bägrä gyene. Pi yepu lui biname te singi yaanajuge babe täápume, tabe cuta singi yaanajuge teeme bägrä täápume. <sup>2</sup> Mine liba Acejiyame täápume singi, pi yepu jaawenane-musi tabe ngena täápume ituge mibibine jaji, piba mine umle gemi, egä mine cuta singi teeme bägräwale bime täápume. <sup>3</sup> Mine liba jaawenane-musi Acejiyame ngena täápume nijaninunge, peei te jaawabudnituge, egä mime singi pisi nyene teeme täápume. Acejiyame ngena täápume nijaninunge, mäpu lica gyene awename, <sup>4</sup> ingle laasi nyene teeme bägrä, tabe ibibi gyene ai gawecewe mule bine apremelame. Peei lui mime ätrunga lui te gawecewe mule bine yaapremalemuge. <sup>5</sup> Eei taatu biname te gawecewe mule bine yaapremalemuge, lui te jäätrunguge, egä Yeesu lui Acejiyame me Bägrä gyene.

### *Acejiyame te Yeesu Keriso ne Jeitnäjenige*

<sup>6</sup> Yeesu Keriso täduji ai gawecewe cabu me ai neeneneni cewecu cama: teebine niije ca ituge

äciseja piiyepu teeme uudi te ituge apira. Teebine niiye taatu ca lica ituge äciseja, yepä teeme uudi te cuta tapiruji. Aceji Seemo te ai neeneni cewecu bine jaaitnäjenige, siige toraca gegi, ingle tabe lui toraca mene jiićenige. <sup>7</sup> Yoo siige, teepi nesae gämi lui cina Yeesu ne jeitnäjenisi: <sup>8</sup> yepä lui Aceji Seemo, yepä lui niiye, yepä lui uudi. Teeme aitneja mene lui yepä gyene. <sup>9</sup> Mine biname bime aitneja ne yaacatusi, yepä Acejiyame me aitneja lui baborage gyene, siige ai lui Acejiyame me aitneja gyene, tabe lui ituge jaji teeme Bägrä poto cidi me. <sup>10</sup> Laati te ätrunga yaacituge Acejiyame me Bägrä cabu me, Acejiyame pui biname me ngenecu cabu teeme Bägrä ne jeitnäjenige. Yepä laati te ätrunga lica gyene Acejiyame täापume, tabe teebine walya me jaawenuge, ingle tabe lica jäätrunguge, Acejiyame lipu teeme Bägrä ne ituge aitneja. <sup>11</sup> Pui aitneja lui eei gyene, egä Acejiyame te iyeteta ireclota ituge ceera mibibine, mine lui ireclota ne jepäninisi teeme Bägrä cabu ca. <sup>12</sup> Laati te liba teeme Bägrä cama yepä birige, tabe ireclota cama yaanajuge. Yepä laati te liba yepä lica birige teeme Bägrä cama, tabe lica ireclota cama yaanajuge.

### *Mene Ngälu cäco Ireclota poto cidi me*

<sup>13</sup> Cane ai ne naace täापume bii byoogärine weeme bau me, lui cina ätrunga ne yaacituye Acejiyame me Bägrä me ngii cabu, egä weene umle äbitame egä weeme ngälu cäco ireclota pisi nyene. <sup>14</sup> Mine wälu cäco gemi Acejiyame me opo gaabe je, ingle mine umle gemi, egä tabe nitecijinuge mine ngena täापume yaawejanusi teeme singi ibi. <sup>15</sup> Siige mine liba umle gemi, egä Acejiyame te

nitecijnuge mine ngena tääpume yaawejanusu, mine cuta piba umle gemi, egä tabe nicärininuge, mine ngena tääpume ituge awejena teebine.

<sup>16</sup> Laati te liba jääpänuge, egä nuuja ätrunga biname te niiya mule jaawenuge, lui mule te teebine budre me lica yaacanuge, tabe miiji pui biname tääpume irecu ätumuta, siige Acejiyame te teebine ireclota gaabe cabu me birige awecnista. Ai lui eei biname bime tääpume lui bime niiya mule cina teebibine lica yaawadimusi budre me. Yepä piti nemi niiya mule lui cina biname ne yaacanusu budre me, cane peei tääpume lica jiićenine irecu ätumutame. <sup>17</sup> Iyeta conocono mule lui niiya mule gemi, yepä iyeta niiya mule cina lica biname ne yaacanusu budre me.

<sup>18</sup> Mine umle gemi, egä Acejiyame me bägräwale cina niiya mule lica jaawenanemusi, ingle Acejiyame me Bägrä te teebibine jäälyenganemuge, siige Satani te äblicäco oomlana. <sup>19</sup> Mine umle gemi egä mine Acejiyame memi, piiyepu mine umle gemi egä Satani te iyeta ai gawecewe ne ecanenige.

<sup>20</sup> Cuta mine umle gemi, egä Acejiyame me Bägrä te ituge otni mibibine umle ceerame piba mine umle äbitame tabe, lui sine toracarage Acejiyame. Mine toracarage Acejiyame cabu ninajininige, piiyepu mine ninajininige teeme Bägrä Yeesu Keriso cabu. Tabe lui toraca Acejiyame gyene piiyepu ngälu cäco ireclota gyene.

<sup>21</sup> Cäme binamewale, ätrunga cabu ca lui cäme bägrä gemi, weene cängena weemämu ire, egä uuje cina gone Acejiyame me puupu ne yaacatusi.

Mene ngälu peese.

**Ireclota Mene**  
**The New Testament in the Bine Language of Papua**  
**New Guinea**  
**Nupela Testamen long tokples Bine long Niugini**

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

---

PDF generated using Haiola and XeLaTeX on 21 Feb 2024 from source files dated 31 Aug 2023

0b7e6c06-9d83-54ea-bc99-bd2fbd2dfe4